

2000 musicians dall'entira Svizra

La 17avla Fiasta federala d'acordeon ha liug il zercladur 2016 a Mustér

DA HANS HUONDER / ANR

■ **L'entschatta zercladur 2016 ha liug a Mustér la 17avla Fiasta federala d'acordeon. Ils organisaturs cun l'Uniu da harmonicas Cadi sco patronadi, spetgan 2000 musicistas e musicists dall'entira Svizra. Las producziuns da pag han liug en differentas salas.** Cun occasiun da siu giubileum da 25 onns igl onn 2006 ha l'Uniu da harmonicas Cadi arranschau la Fiasta d'acordeon dalla Svizra orientala el Center da sport e cultura a Mustér. En dus onns duei il center danovamein esser duront treis dis il mekka dalla musica d'acordeon. Sin l'unium spetga denton ina aunc bia pli gronda sfida ch'avon ogt onns. Quella ga ein formaziuns dall'entira Svizra sin viseta alla fiasta federala.

Nezegiau l'unica caschun

En sesez havess la proxima fiasta federala giu da vegnir organisada el nord-vest dalla Svizra. A quella regiun eis ei denton buca reussiu da catar in'unium organisonta. Alla radunonza da delegai d'avon treis onns ha il president dall'Uniu da harmonicas Cadi, Flavio Murer da Mustér, lu dau d'entellir che l'unium fussi prompta da sorprendere l'organisasiun: «Quei han ils responsabels d'acordeon Svizra buca schau dir duas gadas.» Igl onn vargau ha la radunonza da delegai allura regalau all'unium dalla Cadi la confidanza d'organisar quella fiasta federala. Alla radunonza d'uonn a Kreuzlingen ha Flavio Murer allura gia saviu presentar la regiun organisonta. La davosa Fiasta federala d'acordeon ha giu liug igl onn 2012 a Winterthur. 2009 eis ella stada a Herisau e 2006 a Lyss. «En sesez havess la Svizra orientala aunc stuiu spitgar ina ga 20 onns avon che saver porscher quella fiasta», di Flavio Murer. En vesta a quella fiasta federala sa Mustér era organisar igl onn vegnent la radunonza da delegai dad Acordeon Svizra. Quella caschun vul l'unium nezegiar per presentar pli detagliadamein als rodund 200 delegai la regiun.



Avon ogt onns ha la Fiasta d'acordeon dalla Svizra orientala giu liug a Mustér. En dus onns suonda la fiasta federala. FOTO H. HUONDER

Ina gronda sfida

La fiasta ha liug dils 3 entochen ils 5 da zercladur 2016. Quei onn sa l'Uniu da harmonicas Cadi festivar il giubileum da 35 onns. Per l'organisasiun sco tala dalla fiasta eis ei previu da fundar in'unium. Per garantir ina buna organizaziun ed in bien andament dalla fiasta vegn ei ad esser necessari d'engaschar rodund 300 voluntaris. L'organisasiun sco tala duei vegnir dirigida d'in comite cun diesch persunas ed ina giunta cun treis dels. Flavio Murer che vegn a presidiar l'organisasiun, quenta cun in preventiv da rodund 360'000 francs per quella fiasta. Cumpridas lien ein era las pernottaziuns. Tut en tut spetga ella rodund 100 formaziuns cun totalmeins 2000 musicistas e musicists dall'entira Svizra. Dimora duein quels prender ella regiun da Mustér, sch'ei fa da basegns

denton era ella part sut dalla Surselva. Per il menaschi da fiasta sco tal ein pliras localitads necessarias. Sco zonas da silenzi per las producziuns da pag ein previdas la halla da tennis dil Center da sport e cultura, la halla Cons, la Sala Peter Kaiser e l'aula dil gimnasi dalla claustra. Ina reserva fuorma la halla da gimnastica dil gimnasi. Ultra da quei vulan ils organisaturs era s'adressar alla pleiv cun la damonda da saver far diever dalla baselgia parochiala. Il center da fiasta duei vegnir endrizzaus el Center da sport e cultura. Plinavon ha ei aunc num sclarir la damonda pil depot dils instruments duront quels dis. «Ei se tracta tuttina da rodund 2000 acordeons cun ina valeta da circa diesch miliuns francs», di Flavio Murer. Ils singuls instruments han ina valeta da 3000 entochen 30'000 francs.

Cun concerts el vitg

Sco la davosa gada tier la Fiasta dalla Svizra orientala, vegnan las formaziuns era a sepresentar – sche l'aura lubescha – sin differentas plazzas el vitg. Ultra da quei vul Flavio Murer era empruar d'integrar las pendicularas el menaschi, perche las musicistas ed ils musicists sappien serender a Caischavedra. Il proxim temps eis ei era previu da menar discutors cun responsabels dalla Televisiun svizra. La finamira fust in'emissiun directa la sonda sera el rom da «Potzmu-sig» e quei naven dalla nova piazza dalla claustra. Il venderdis sera duei la fiasta vegnir iniziada cun in concert da gala dall'Uniu da harmonicas Cadi. Per propagar la regiun patratga l'organisasiun era vid la reclama, respectivamein la vendita da products indigens duront quella fiasta.

■ CUSSEGL GROND

René Epp, pcd, Sedrun

Datum da naschientscha: 23.12.1982

Stadi civil: ledi

Occupaziun professiunala: Cusseglader da finanzas

El Cussegl grond dapi: Suppleant da deputau dapi 2010

Engaschaments ordeifer la politica: Trenader umens 5avla ligia CB Sedrun/Mustér

Hobbis: Ballapei, tennis, Ambri Piotta, viagiar, cumpignia

Bubronda preferida: Coca-Cola

Spisa preferida: raclette

Destinaziun da vacanza preferida: Canada

Lungatg preferiu: romontsch

Exempel politic: in politicher sincer ed accessibel



Daco duess ins eleger mei el Cussegl grond:

Perquei ch'jeu sun in giuven engaschau cun gronda motivaziun da vuler muentar zatgei a Cuera el Cussegl grond. Cunzun teidlet jeu tier, per capir nua ch'ils quitaus ed ils giavischs dalla populaziun ein. Tenor miu manegiar in'impurtonta premisa per dumignar las sfidas dil futur. Per bunas ideas e projects da potenzial per nossa regiun vi jeu cumbatter cun tutta perschasiun. Cun anim e bia slontsch vi jeu era dar ina vusch alla giuventetgna a Cuera.

El Cussegl grond less jeu s'engaschar per:

– Il svilup dalla patria schei fetg a cor a mi. Perquei vi jeu en emprema lingia s'engaschar per in bien svilup e bunas perspectivas en nossa regiun periferia.

– S'engaschar per bunas cundiziuns da viver per giuvnas famiglias. Cunzun era per dar ina cunterpeisa alla depopulaziun ellas regiuns muntagnardas.

– S'engaschar per ina migliur dallas colli-giazziuns da traffic ellas regiuns periferas.

– S'engaschar per bunas cundiziuns da rama per l'economia ed il turissem.

– Era vi jeu rinforzar la collaboraziun intercomunala per in progress persistent en nossa regiun.

Mia cumpetenz politica:

Dapresent sundel jeu novs onns el cussegl da vischnaunca da Tujetsch e sis onns el parlament dalla Regiun Surselva. La pcd dalla Cadi astgel jeu presidar dapi quater onns ed en suprastanza dalla pcs giuvna dalla Surselva sundel jeu dapi siat onns. Cun respect e buna maniera vi jeu anflar maioritads per cumpromiss che portan soluziuns optimalas per in bien svilup persistent per nossa regiun periferia. Cun engaschi e perseveranza sundel jeu motivaus d'anflar ils contacts ch'ei basegna per saver dar ils impuls necessaris el Cussegl grond.

Tgei utschals ein gia cheu?

Dumbraziun dils utschals d'iert e curtgin en Svizra

■ **(an/sr) L'Associaziun svizra per la protecciun dils utschals (BirdLife Svizra) envida la populaziun da participar ils 9 ed 11 da matg all'ura dils utschals da curtgin. Finamira da quell'acziun ei da cumprovar con impurtants che curtgins ed orts en accord culla natira ein per ils utschals.**

Tochen 20 sorts d'utschals pon vegnir observadas en curtgins ecologics e naturalis. La pagina d'internet tier l'ura dils utschals da curtgin porscha tuttas informaziuns necessarias e la caschun d'exercitar e definir cun agid d'in quiz las sorts d'utschals.

Tgi che posseda sez negin curtgin

ha la caschun da dumbrar ils utschals en in parc ella vischinonza.

Dumbrar la damaun

Contas sorts d'utschals dat ei els curtgins svizzers? Tgei utschi entaupa ins leu il pli savens? Tgeinin dat ei il pli pauc? Tgei connex dat ei denter la

structuraziun dil curtgin ed il diember d'utschals che visetan quel? L'ura dils utschals da curtgin duei rispunder quellas damondas.

Tenor L'Associaziun svizra per la protecciun dils utschals ei la participaziun a quella fetg sempila: Sesi enzacu denter ils 9 ed ils 11 da matg duront ina ura en vies curtgin, tenor pusseivladad la damaun cu ils utschals ein il pli activs. Nudei tut las sorts che vus pudis observar, dil pasler da casa entochen tiel sprer che sgola sperasvi, dalla columba terca sin tetg tochen tiel petgalenn. Suenter l'ura d'observaziun san ins registrar sin www.birdlife.ch/Gartenvoegel las sorts dils utschals ni termetter la gliesta per posta al SVS/BirdLife Svizra. Quel valetescha las datas suenter l'acziun e comunichescha a tuts participonts nua che lur curtgin schai en cumparegliazziun cun auters en Svizra e co il curtgin po vegnir concepui a moda cunvegnetta per la biodiversitad. La davosa ga ha l'ura dils utschals da curtgin giu liug il 2008. Allura han ils participonts registrau 87 sorts cun tut ensemble bunamein 9'000 utschals. Ussa vulan ils organisaturs mirar co ei vesa ora sis onns pli tard, ein spannegiai da cumparegljar e vulan repeter regularmeins quell'ura da dumbraziun dils utschals da curtgin.



Il petgalenn grond ei avisaus sin in effectiv da plantas veglias els curtgins.

FOTO: MICHAEL GERBER SVS/BIRDLIFE SVIZRA